

武寧縣志卷之四十三

藝文詩

近體新增

題俯江樓圖畫冊

學政

周系英

湘潭人



鹿洞鶯湖自昔推江樓今見曲池開文章應得溪山助世澤  
頻將桃李培室有藏書同鄴架地多好景卽蓬萊西園東壁  
家聲舊應繼當年著作才

看鶴橋新成

張問行

點綴仙踪聳碧霄誰言有鳥託嶢嶢水疑廣漢流明月城似  
瓊樓度玉簫豈必丁仙真化鶴儘教司馬徑題橋紛紛闐闐  
空塵雜眼底蓬萊付寂寥

遊石鏡山

邑貢生

李趣堂



一山深處叩無因蕭散今朝笠屐新出寺鐘搖烟際樹隔溪  
犬吠鏡中人孤雲片石仙誰伴積雨空林客絕塵甚欲招提  
分半榻洞天閒養十年神

巾市

挂巾而後卽名村到此風流六代存白鶴南飛餘稗史青牛  
東渡是仙源野連竹塢開棋局石占雲龕有漏痕十里溪山  
桑未海憑誰舊事說蟠根

過盛義士舊宅

西城十里舊名村義士當年此闔門野水近鄰書圃咽山雲  
濃作賊旗屯枕戈自領全家節奮劍猶留中柱痕古屋三間  
移地主後生渠解弔英魂

采蕨詞

邑貢 李受縉 二山  
生

乙巳歲大飢貧民倚蕨爲活深山僻谷掘取殆遍霜  
出星入備極苦辛余周歷其狀感而賦此

自編棚戶寄山陬終日揮鋤爲食謀底事凶荒難作活樹隈  
雲塢費羅搜

荆扉早起看東方天淨雲空滿地霜短褐嚴風不道冷柴根  
何味也充腸

渣滓新淘澗水邊圍筐絡石朔風天林梢月落雞聲唱谷口  
猶聞杵臼喧

歲云暮矣尙留山婦子相招荷鍤還貰酒村帘歡度歲只偷  
元旦一天閑

過武陵峩

黎 澍 次元

巉巖斲削鬼神工絕巘盤紆鳥道通雲霧吐吞峩骨老蛇蟲



出沒樹心空愁人一壑松楸雨吹我孤征薜荔風故老猶能  
談往事相逢嶺畔說丁公

雲臺秋眺

烟光蕭瑟萬山中獨上雲臺極目空古石嵯前飛木葉白雲  
堆裡聽秋風霜娥未老山頭碧鳥雀還驚樹底紅自愧琴書  
飄泊久藿溪鷗鷺也羞同

過荆陂潭

在四十  
六都

峭壁摩天石磴危秋風吹雨過荆陂浪花輕撼魚踪沒天影  
虛涵雁字岐古壑雲堆菩薩岬空山月冷梵王基我原汗漫  
忘機客水鷺沙鷗莫浪疑

石湖謠

王子音 心言

石湖袤廣百畝開自明十九傳祖良士公其以石名

者仍破石之名也環湖居者三百餘戶資灌溉者千  
七百餘畝自良士公訖今三百餘年安安熙熙世享  
太平庶幾樂土矣子音生長湖上追懷先澤寄諸風  
謠亦在湖言湖已爾

儂家家世住蟠溪水滿長湖柳滿堤烟火江南圖畫出幽風  
借作竹枝題

東風吹裂滿湖冰雪點楊花水面萍昨日清明今穀雨良苗  
夾鏡已青青

鹹魚麥飯倩栽禾四面平湖百藕歌別有前村秧馬急鷺鷥  
灘下峭帆過

麥笠搖風轉轆轤鹹茶淘飯打高呼不停晝夜分班代喜得  
秋來水滿湖



早谷初登治粟田不分旱澇趁秋前家家夜半炊晨飯我灌渠栽月在天

柳陰晝啖苦甜菰可口休聽婆餅焦記得那年湖水涸黃瓜

菜粥也攔腰

俗謂午饘爲攔腰一充

搖躄也樂樂何遙收日日楊堤夾听招松樹河頭鴨足渡兩地

名夕陽牛背雜風謠

五穀豐登合室歡殺雞酌酒祭神壇今年還卜明年好願得盈湖水不乾

### 石市吟

貢生

熊鎮瀾 歐爐

江干遙望碧烟圍小市青帘桑柘稀數世商家成土著幾朝民屋老荆扉蔥蘢屢刈三收稼旖旎常新九月衣任爾荒年無菜色潭頭洞裏采樵歸

支離此地竟桑榆環堵蕭然笑守株過眼風雲皆幻境留人卷軸是真娛鐘敲隔岸烟迷棹酒散荒廬月在梧壇上一燈歌舞者南遼落拓有歐爐

### 宿松山寺

司訓

彭

焯

寧都州人

歷盡重巒到上方松風吹送雨花香雲深款客虛堂靜活水煎茶夜話長

寒泉宛折石嶙峋掩映曇光丈六身解得拈花含笑意蒲團作伴是前因

鐘聲敲斷晚烟寒雨滑添愁客路難底事瓚公煨芋火多情兩夕勸加餐

鳥語催行曙色遲出山重訂到山期前緣莫問三生石記取留題壁上詩



庚午秋豫寧書院留別

翰林饒向榮東鄉人

柳峯修水重流連幾度薰風到榻前漫有文章通意氣多勞  
翰簡結因緣詩書學海尋先輩事業名山認後賢一幅征帆  
灘百轉長安翹首杏花天

舟宿麻潭弔胡紹遠兄弟

徐忠孝錢樵

溟濛殺氣呷頭橫紹遠當年此拒兵秋草已殘邊將血江風  
猶作戰塲聲枕戈到底存忠義陷陣還能共弟兄一片青燐  
飛夜影舟人遙指舊軍營

九日登萬福寺

歸來兩負黃花節今日峰頭著意看嵐氣影移山麓動松聲  
遙撼海濤寒但憐心跡秋兼淨莫問功名葉共殘三十年前  
曾此寺滄桑滿眼一憑欄

暮春登獅子嵯

幾度斯厓共散襟泥銜紫燕又重臨青山不老盟還續碧水  
長存勝更尋酒酌危亭知己意詩敲傑閣故人心最憐謝傅  
遊成癖基墅風流竟至今

清明日拜師友墓

鶯歌蝶舞綠楊中墓拜吾師酒不空雙屨立殘三尺雪一羶  
坐老十年風忍忘陶冶勞全力敢說烟雲滿寸衷翹首魂來  
天漠漠啼痕化作杜鵑紅盛字雲夫子

浩蕩春風麥飯時殷勤墓拜韻溪師十年讀後香三炷萬里  
歸來酒一卮不朽中郎惟有女可傳伯道竟無兒那堪淚灑  
衣痕濕幾樹聲聲叫子規李韻溪夫子

秋雨秋風宦遠天我師送我艾城邊江頭一別成千載墓下



重來又廿年但識窮通皆有數漫嗟兒女獨無緣平生肝膽  
勞相照忍向春風淚不鮮陳竹屏夫子

當年磨劍話崑崙今日還家拜墓門十里花飛知己泪一江  
雲湧故人魂辨香渡水何辭邁樽酒來山豈憚煩生死縈懷  
情不盡夕陽遮莫下黃昏丙兄費逸亭

歸然三碣蝕蒼苔昆季慙慙酒一杯地下獨嗟君已去天邊  
應識我還來交論道義情原厚誼重安危念豈灰最是不堪

今日意鳥啼花落總成哀盛水巢琢愚照堂昆季

瓜源雜詠四則

舒 鏜

吳峰之外居民稠活活陂塘歲有秋飽食暖衣君自取大家

努力易田疇瓜源

割據何曾盡有東一時韜畧霸圖空而今剩得荒榛裏鐵塚

巍然遠望中吳王峯

十二珠圓怪石頭江心鼓浪戒行舟神龍駿馬驅前後日夜

何曾阻下流三碣灘

一村大注想先民五百膏腴漫肯貧食德服疇忘手澤仁山

祖是插花人大注村

庚寅九日偕洪瀚青遊白雲寺

副貢 李葆光良玉

寺外重重樹色蒼故宮傳說自南唐劫灰不盡仙娘術塵世

惟留秋草芳日透疎窻幢影亂風迴翠竹鳥聲忙息機何處

通禪偈三徑花開菊有香

丙申清和節遊龍潭寺和柯學光原韻

鄭公堂上古苔留密竹逕中想昔遊狎客鴛鴦臨水鏡愁人

風日到山樓棟花開後香連徑芳草繁時綠滿洲舊事荒涼



武寧縣志 卷四十三 頻弔古廣心軒外興濃稠

苦節詩為盛熊氏作

邑令尹作翰 湘潭人

節婦盛熊氏年三十三而寡家徒壁立苦節三十餘年一子病弱嘉慶乙亥歲荒母子相繼歿詩以憫之鏡破幽閨痛藁礎那堪貧病更交侵卅年勉踐生前約一飯猶寒死後心逝者恨難媧石補餒而愴甚掌珠沉慚余惠鮮無長策承乏空鳴琴

紀田李氏割臂詩

氏名阿芸田德鄰之妻邑貢生李蓋孫女姑陳氏患痰瘵危甚阿芸於九月初三夜割左臂肉以進病痊孝重守身氏非冰淵之意矣然亦足以示鄉曲庸行無奇特胡為肢自殘但能愚以達亦見事之難霜鐸閨

中淬冰肌釜底寒爾姑病痊可蓬戶永承歡

奉和尹明府紀蓋孫女割臂詩原韻

貢生李蓋 初堂

癡兒安解孝弗恤體膚殘事此原非正為之蓋亦難四更心孔切一嚮瞻生寒褒予蒙賢宰承懽恐未懽

伊山道中

兩山如闔戶曲磴似難通鳥道循溪轉樵夫夾路逢斷崖懸短約碧澗下飄蓬顧謂從遊者吾將馬首東

城東暮游

邑廩張斌 力菑

藕花開盡晚雲深十里新涼天氣陰臨水人家秋草綠隔林僧寺一蟬吟松楸冷落分柘酒鷄犬闌珊伴藁礎詩句不堪重檢點春風前度阮郎心

晚過龍溪寺

邑貢余在藻 若冰



鄉村離小徑梵宇入重林井自靈巖出巖室有石泉盛臺披

蔓草尋寺南一石黎博莽鐫講經臺三字今沒夕陽連遠火新月上高岑卓錫

人來此爐烟直到今

遊武陵岷

不作飛來勢偏占特地雄爛柯碁有局煉石鼓如銅彭蠡蒼

茫外江城縹緲中絕頂一峯可望尋幽誰到此樵徑一山翁

重遊淨明堂

不到黃山二十秋紫芝瓊樹洞門幽塵封古壁餘名韻座對

良朋憶舊遊流水依然丹竈冷閒雲如故葦宮浮致菴遺跡

終難覓石色蒼蒼一磬留

武安山

王鶴暉聽瀾

摳衣漉漉碧峰頭窮男雄開壁壘稠羅拜兒曹空疊翠摩抄

劍氣漫橫秋蓮塘水冷侵蟲蟻石磴雲肥縱馬牛數百年來

征戰盡何須弔古恨麻洲

登城東浮圖

邑廩劉夢說去厓

綰笏直上碧雲端鈴鐸聲驚數里寒萬竈烟光生下界九天

風雨近雕欄舊基荒沒憐耆老塔下舊為文昌閣故址新鎮雄開憶長

官西望後猊青百尺千秋遙與峙江干

躡屐緣梯屈曲通江山面面總玲瓏目窮吳楚蒼茫外身在

烟雲杳靄中勝地隱增興廢感文峰應祝後先同瓣香遙向

滇南拜百尺甘棠識名公

秋日同友人遊天池

邑庠張明遠愈謙

火雲猶未斂奇山渴想秋風水一灣石洞烟深龍欲住衡陽

雨斷雁初還草迎古寺聽猿急花落荒台繫馬艱到處不堪



憑弔古丹岷惟許個中攀

寒烟漠漠靜秋山遠水空澄蘸碧灣白鳥影從天際沒孤帆  
遙向日邊還風來橫笛悲長嘯老去簪花好自艱為我暫留  
池上月荻蘆深處共君攀

竈石詩和韻

李在宮 齊芳

取惜空山小有天不逢青眼已年年崆峒自應吾家有竈石  
寧徒此日懸水出崑心清欲沸春臨洞口碧如烟居人幾輩  
摩挲久漫掃虛房一坐禪

武安山

王鶴音 醒初

叠嶂層巒鹿豕奔當年戎馬此間屯  
屯麻潭會奮勤王勇修水  
誰招壯士魂亂石叢中尋寨趾斷垣堆處認軍門雖然寂寞  
前朝事興廢茫茫感慨存

為王為虜古來多成敗由天可若何亂世英雄終草莽衰元  
粉飾諱干戈蚍蜉撼樹忠堪惜精衛填波志不磨生意凜然  
千古在夜深燐火滿山阿

萬福寺

王紱 渭濃

遮欄水口結高臺聯屐登臨亦壯哉石磴欹斜衝霧上禪門  
軒敞對松開鳥窺密竹驚人去犬隔層林吠客來自笑浮生  
成底事楞嚴讀罷愧凡胎

三斗坪感懷遠公由浙宰武後景泰間召為集賢殿待

制不赴官籍坪中

國學夏雲 參舍

百里郎官浙水賢綠蘿深處老風烟當時琴鶴清如許此日  
溪山畫故然南國別開三斗派西安長戴萬家天玉堂不換  
坪中趣占籍何妨自我先



遊萬福寺

邑廩張 翻佳郎

高山橫竦獨當空幽境留人蕭寺中雨打疏檣翻竹露絃飄  
曲檻響松風幾層翠岫張藍幙一道青溪繞白虹表裡分明  
縣眼界舉頭還訝與天通

上頭陀寺呈梅岑叔祖

余興樂 存三

拂拂春風度天天桃李枝循途尋古刹隔地訪經師門外原  
無雪家山係有絲菩提施化雨弱草亦求滋

初至頭陀寺

貢生 盧宣旬 來庵

悔不歸來早林泉此地幽路迷山徑曲人到竹聲秋乍覺心  
如水誰惟隱是邱老僧何處去破壁白雲留

雅集追先輩扶筇愧此過無才能繼美有志敢同科古木山  
中密閒雲屋外多躊躇斜日下飛鳥正還窠

上董源觀音閣

邑舉 鄔魁斗 曉嵐

境非幽絕不棲僧山寺如斯得未曾屋以懸崖高下結橋由  
斷澗短長乘十年鞍馬空行篋一榻琴書憶舊燈纔賦歸來  
又惜別還當重與說南能

壁田雜咏

邑庠 余斗南 讓三

花明草碧讀書臺無限春光面面開昔日文壇成古蹟千尋  
嘉樹倚雲栽 讀書臺

後猊山勢踞中流昂首真疑薄斗牛水作吼聲雲作鬣漫云  
溪有毒龍游 獅子山

大陂潭水日悠悠烟雨迷離幾度秋一自山人留好句至今  
餘韻不東流 大陂潭

巍然一柱插蒼穹四面青螺在下風到此塵心都不着幾疑



身在碧霄中 天柱山

九日遊疏峰寺 一名龍王腦

李家俊 課郎

秋色秋聲淡此峰年來九日慣扶筇雲流古屋丹楓靜露冷  
頽垣蔓草封有客尋香過石徑何人舀水下寒春齋厨醉我  
茱萸酒底事名山更號龍

墉埠竹枝詞

李維綱

昔日西流近北侵灣傳墉埠代相尋至今高岍桑田處掘得  
沈航十丈深

連村正月早迎儺裝點兒童學舞戈金鼓磔禳輪值後元宵  
燈火逐門過

舊聞打虎擅曠田曾慣長林列陣前近日太平無猛獸鍊鎗  
機傘漫留傳

種豆桑陰產物華秋來爭向酒筵誇紅絲數縷杯中起絕勝  
仙人嚼晚霞

拜馬守府墓

邑人吳泗 賓淮

東郊閒步弔忠魂冷雨酸風鎖墓門半畝荒園一抔土年年  
杜宇叫黃昏

白頭兵起競銜枚江省西南鼓角哀蕞爾孤城資保障憑誰  
畫策掃氛埃

將畧由來破苦辛裏尸馬革屬何人銅標早建原家學又見  
將軍是後身

掃盡機槍氣不舒論功誰與易銅魚可憐此地埋孤塚寂寞  
金陵望故居

豐樂寺

邑庠熊肇元敬修



廿載江城始賦歸，掃除舊恨契禪機。山邨鎖處開豐樂，溪水環中闢翠微。好友常邀沽酒店，清風多伴釣魚磯。大橋西去家園近，紅葉蘆花隱落暉。

五泉洞借門人余峻

邑廩張邦達 豁懷

潤物心原急，爭流出大川。濤飛千練淨，泡湧五珠連。噴石晴常雨，穿崖嶮可田。鍾嶸詩品妙，琴向綠陰眠。

賓陽橋晚眺

張大經 肅齋

迎恩門外古賓陽，竺壽清風到女郎。罷市人歸紅樹急，還山鳥渡碧烟忙。林間大半要離塚，湖上誰新子侃堂。側帽天津朝易暮，百年世事感滄桑。

四望亭懷古

盧先枝 片雲

賜緋同日拜堯階，訪友閒登百丈崖。郭外一亭高莫並，山頭

四面望無涯。重新有客追風雅，話舊何人續等儕。先後凭闌雙宰相，烟荒草蔓正縈懷。

答雲臺寺某上人

柯愈達

袈裟閒坐石臺橫，不定行蹤笑我生。十里秋光回首處，空山烟雨讀書聲。

同畢鏡庭夏占鰲登大崙山

邑庠李子昂 容圃

高登古寺碧烟濃，老樹蒼藤小徑封。幔卷白雲羅密竹，牕開紅日漏疎松。長拖匹練橫修水，遠出層霄峙柳峰。何日同君參上乘，大羅天外契禪宗。

劍山早秋

邑庠盛濤 嘯江

何人報道梧桐落，有客狂歌對夕陽。壯志偏驚秋色短，家山獨對晚風涼。百年事業餘殘暑，十載功名一敝囊。底事寒蟬



聲不斷王孫早已付滄桑

訪鄭山人故址

李赤岸秋

巉巖怪石鎖江干返照入江峰影寒蒿艾披離址顛顛龍蛇  
剥落蘇團團豐熙第宅餘荒址騷雅風流悵暮巒最是山川  
流峙處幾林黃葉聚飛翰

修步雲橋成同友人賦

陳笏劍西

年來病涉總傷神喜見長虹臥古津三載星霜心力瘁一朝  
車馬往來頻留題藉有青雲客扶杖欣看白社人漫羨濠梁  
饒樂事相攜斗酒醉花茵

題破石

邑貢 王崇德 原名 勳

銛鋒傳寶鏘峭石破茲山修水蟠如帶秋潭淨若閒蛟龍潛  
伏處下卽龍腹潭水月兩清間黃山谷嘗題水月雙清四字世澤開南宋長坪

鎖一灣

題石湖

鏡寫長天色波涵倒影山水寬魚鳥樂歲稔桔槔閒婦餉垂  
楊岼碁敲碧藻間最宜秋潦淨新月掛銀灣

地平雜咏

邑人 陳致新 嶺梅

澗水潺湲匯兩渠彩虹齊臥勢凌虛橋邊應有仙翁至孺子  
殷勤待秘書

誰將翠蓋聳陰清藉有蒼松不世情野老幾回醒午夢颼颼  
滿耳聽濤聲

修江砥柱鎖雄關翠影嵐光霄漢間孰令名山長姓柳讀書  
臺上暮雲閒

康山亭子薄雲霓四面峰巒入望低搔首談天空濶處秋烟



漠漠下蕪溪

三鈞岷

俗名鑼鼓洞在南鄉其上為瓶源

邑廩盛學蘓屏宇

瓶源瀉處透天池瀑布匡廬想見之繞樹溪聲疑跋浪穿枝  
雨點訝纒絲雲根誰躡蛟龍跡石罅常深江海思坐憩茅亭  
懷往事喧闐鐘鼓正催詩

四望亭懷古用韓魏公元韻

郡庠舒暢之海帆

依然勝跡附巍墻遺澤先民春思長荆棘丘墟新景物水山  
圖畫舊封疆使君星渺人思馬墮淚碑殘我憶羊盡日亭中  
望不極摩挲烟樹下斜陽

春日遊鳴鳳寺

舊名毘盧岡又名西瓜寺

盧志組諧石

松杉萬壑翠娟娟礪水奔飛漲野泉夾徑閒花多引屐傍門  
餘址半成田雲端擊磬僧傳課竹裡烹茶鶴避烟却笑此身

無暇日飯依何計脫塵緣

次朱明府象牙洞茶詩元韻

邑庠李峯肩吾

謾說盧同七椀茶野人輸悃火前芽金槍剪剪冰壺月玉屑  
霏霏石頂花坡老品餘增物色涪翁去後減聲華從今又得  
添佳話休向寒山處士誇

寄呈張閩榻先生

巍峩從笑腐儒冠掩卷何須愼寤嘆跡遠公卿非脫畧雲浮  
富貴豈懷安文章揖讓周秦漢古道持循孔孟韓百里相思  
嗟歲晚飛鴻不度雪漫漫

水月亭

監生張景瀚

勝踞城西別境開歌盤山麓水之隈一亭秋色江環抱萬頃  
波光月送來自擅龍潭清影趣

亭下黃山谷題有龍潭清影四字幾經鶴筆



元寧縣志 卷四十三  
上人才祇今留得浮圖影搖漾東風洗碧苔

修文塔紀事

邑庠 盛學暢 驥達

欲樹文壇幟先修雲路梯人工彌缺陷地脉認端倪鞭石慚  
無術登高敢擅題賢侯培植意桃李自成蹊

勿剪亭

州同 畢汝昌 良青

韓公而後遂名隆底事溪山總不同勿剪阿誰思召伯蕭蕭  
楓葉下秋風

永慶寺

卽夏 懷寺

邑庠 盛學黃 鍊機

迴龍游覽嘆荒涼作鎮重新選佛場鳳嶺參差分竹瘦獅岨  
拱峙引江長纜牽洲嘴晴兼雨菜壅城根市亦鄉紅蓼蒼葭  
秋滿眼伊人誰在水中央

暮春梅顏墩卽事

吏目 畢富會 文元

梅顏紅紫餽輪蹄歷徧深春醉眼迷水漲不妨漁艇細山高  
自覺鶴巢低芝蘭向暖宜修禊童冠嬉晴詎浴沂折柳阿誰  
橫短笛東風吹過小橋西

蟠龍寺

張東辰 碩存

濃鎖雲烟石磴斜勢蟠牙爪未全遮路迷丹鼎遺仙址嵐盡  
奇峰結梵家風弄貝音翻竹柏月移書幌罩枇杷重來此地  
僧知否靜閉香臺就五車

東湖古白馬廟紀事

邑庠 李會春 葦舟

綠水東湖柳听邊董公祠宇草芊芊虹橋過處風波靜牛斗  
望餘劍氣懸玉柱安瀾羈白馬鐵爐純火裊青烟當年居里  
誰徵實剩有殘碑得信傳

縣志誤載董晉字混成武寧西門人廟碑載武寧瓜源人

萬福寺

監生 潘元譜 鞠芳



笑兀獅嵯踞上頭四圍古木帶雲稠長吞鳳口三源水翠枕  
桐林一段秋竹掩斷嵯懸石磴欄憑絕壁瞰溪流此間饒有  
烟霞趣好對羅天豁遠眸

登玉泉山

熊翼豐 茹舍

尋幽底事到雲巔欲覓禪關白玉泉石骨倒懸秋澗水鐘聲  
遙落洞門烟莓苔自錄三丫路松竹常陰六月天對此渾忘  
塵世界靈源長濬日涓涓

鹿岡晚眺

熊高德 浴川

仙人西去白雲空躡屐捫蘿暮色中牛峽祇餘春樹碧鹿嵯  
長伴夕陽紅荷柴豎返荒烟外趁渡人喧古岫東此日登臨  
多寂寞同儕誰憶舊時風

紀龍峰

王子笙 鶴山

巍峩勢欲接穹蒼古樹蕭疏一兩行烟裊迴風嵯嶽出鳥冲  
宿霧嶺頭翔綠蘿深鎖金城固 峯下有金城觀紅日斜穿石鏡名光  
不是山靈堪降雨誰來絕頂祀龍王

太平山

邑庠 王鳴達 于岸

層巒擁翠插天關流水行雲自往還古殿清幽人對語浮生  
幸借片時閑

柳山聞笛

王文馥 西園

寂寂寒山小徑通客心愁鎖梵王宮早春不及美人意一笛  
梅花落曉風

業山硯

廩生 盧定煥 黟存

此石埋藏久浮山魄礪多忽然逢匠斲遂爾出巖阿潤澤深  
逾好堅貞老不磨瘦吟空谷裡鵲眼顧如何



古蹟八詠錄四

盧元璋 樸山

滿徑濃陰蔓草侵江公底事入雲深讀書此處饒先達俗語

荒唐勢不禁瓜源書臺世傳江萬里讀書處舊志已辨其非

仙人居址系遼東兩地遼東自不同何事鶴翎難再覩橋邊

惆悵憶了公觀鶴橋

菽水承歡信古今娛親詎必自臨深朱公孝行留茲井傳會

無端指鑿尋孝子井

石磴嶽嶽一瘦岡村童野豎牧牛羊將軍不飲當年馬勝跡

誰留草木香飲馬岡

柳山讀書臺

盧盛淑 湛虛

伊誰位置讀書臺當日貞公到此來案牘消除心地濶友朋

親密性天開雲邊酌酒酬清興石上揮毫掃綠苔風韻不因

陵谷變名山猶是識栽培

青牛峽

國學 熊羽就 為上

衆山迴合處南北自區分昔日共防虜此中曾破軍交飛溪

上鳥不隔嶺頭雲訪道青牛客悠悠鍊笛聞

水月亭懷古

李心暢

水月流連處逾時一變遷涪翁留此勝清影至今傳路逼江

崖險亭傾石磴穿惟餘蝌蚪字剝落蝕風烟

遊玉清宮

姚一瓊

仙房誰與玉同清老子廬前遠黛橫古樹參天芳草瘦閒雲

繞屋晚鐘輕松花滿布來飢鹿竹翠平鋪罩睡鶯坐對活泉

心更靜皈依遙憶入山情

嚴陽山

翁宗榮

式字系志 卷四十三 藝文近體



正五 卷四十三  
崎嶇石磴斜過處白雲遮怪石蹲如虎蒼藤曲似蛇棚民編  
甲戶畚燒墾桑麻在昔荒榛莽風烟表物華

老蛤石

高阜多奇特卑岬亦絕倫無聲鳴竅穴有象躍江濱纜擬牽  
蝌蚪珠應吐巖壙地靈非有意長此駐嶙峋

重陽過泗洲寺

盧雋拔 墨郎

猶憶當年此梵堂幾回詩酒度重陽追隨兄弟兼師友討論  
周秦及漢唐貝葉難尋三昧秘木魚空嚮一僧忙暮雲黯黯  
禪關外漫有黃花晚節香

泗洲寺感懷

盧霞舉 南州

泗洲依舊此彭隴雲樹蒼茫一望同經室尙傳三世火禪林  
漫溯兩朝風跡遺雁嘴山名荒烟外悲在蘆花山名落照中長使

文孫憑弔處摩挲殘碣篆痕工

過方鴈里先生墓

盛 躋 特村

筍輿偶爾墓前過拜向苔封古篆摩大筆已難求舊稿鴻名  
僅得數巍科春風翁仲縈芳草夜月祠堂映玉波屈指於今  
三百載蒼茫身後悵如何

望江樓懷古

盧志綏 白亭

此地曾傳水上樓當年賓主擅風流祇今極目涇濱外兩岬  
蘆花數點鷗

看鶴橋同宗姪綠波分韻

夏芳茂 鶴溪

藕花塘畔水淪漪百尺長虹結構奇秋老溪聲流月碎山高  
鶴影下天遲家中誰識千年客亭上人傳七字詩城郭到今  
如故否清宵莫負共來時



遊柳山讀書臺

陳 範 浴書

夙仰高賢跡今朝躡屐來路忘三徑仄眼向九霄開洗墨空  
遺井橫經剩有臺殘碑留古篆讀罷意徘徊

登文峯塔絕頂

國學 盧志絡 北堂

一峯屹起盡雲端入面玲瓏縱大觀烟火萬家山色迥城樓  
百雉畫圖寒蹲獅傑閣低塵壤飛鳳閒僧掃石欄不有賢侯  
培植意干霄那得士林歡

羲洞瀑布同門人家駟分韻

增 余未學

羲皇遺洞在一水落晴空瀆薄千絲雨迷離百丈虹蛟龍疑  
有窟懷葛詎無風頃刻朝宗意長鳴入洞中

遊西巖

程 越 超然

聞說西巖擬洞天來遊悵未渡前川空餘獸象蹲山麓 巖形如獅

前建

小刹 剩有鍾聲到耳邊彼岼橫舟還泛泛我懷清興尙翩翩  
何時鼓棹乘風濟遍閱靈奇了夙緣

望江樓懷古

盧定垓

不見江干舊庾樓荒垣漠漠草悠悠漁樵未解悲離黍風月  
徒爲戀素秋至此踟躕尋往蹟更誰詩酒續前遊當時謔詠  
人何在惟有長江日夜流

泗洲寺弔古

盧志綸 載馨

到此方能滌俗衷紅塵遠隔白雲中牽人傀儡誰先悟過眼  
邯鄲覺後空補壁殘箋淒夜雨封門古樹瘦秋風老僧不解  
悲歌意山酒殷勤勸醉翁

前題

盧志縉 竹吾

無着休稱不老翁禪門那復舊家風經壇草蔓香台冷錫杖



武寧縣志 卷四十三 四百二十二  
雲飛佛院空澗咽細流危石上山寒野菊暮雲中由來此地  
憑先澤田海滄桑啟寸衷

柳峰懷古

盧志純 韻虞

孤峰依舊紫嵐侵誰復披雲一日臨湧翠亭邊紅樹繞貞公  
祠外綠蘿深石門詩句侵風雨雲壑泉聲變古今徙倚荒筵  
還寂聽曉鴉飛上夕陽林

飲馬岡

邑廩 盧書洛 慕伊

山徑嶽嶽舊有岡岳公策馬討平楊嘉名漫擬長城窟遺像  
曾留百戰場牧笛橫秋依碧澗樵斤斫晚帶斜陽非關節烈  
千年壯那復平原姓字香

棣華堂

邑廩 盧為軾 凌湖

宣和門內有人家宋代冠裳額棣花兄弟入行才並顯友于  
累世愛無差天朝錫類來優詔仁里詒謀自物華數百餘年  
傳世德荒涼古屋畫龍蛇

義溪

鄔樹績 煥雲

江州自昔擅名門艾子城西復有村堂錫嘉聲開棣萼溪流  
活水兆金昆環家老少垂千口繞膝曾元共一尊雅化卽今  
多輯睦好敦孝友奏篋墳

瓜源淨明堂感懷

李子膏

深山茅屋幾何年有客來遊思渺然萬卷藏書隨羽化 國初道人  
李致菴與書萬卷誅茅於此今多殘闕 一卷古石尙高懸 石磬尚存 空留明月窻中

白誰駕青牛物外旋花落花開春寂寂每教風雨下林泉

足才閣

李心顏

吳公作宰復何如宦橐蕭然善積儲別有倉箱錢穀外偏饒



武寧縣志 卷四十三 三 四百三  
結構古今餘縱橫鈿軸鋪緇帙緝綴山芸絕蠹魚文吏風流  
兼仕學訟庭閒處是琴書

棣華堂

周壽堦步三

累世同居艾子城金昆玉季擅嘉名芝蘭並秀惟賢友棠棣  
聯芳本善旌五馬由來惟悌弟八龍端的是難兄當年佳話  
留題處世德祠前樹紫荆

讀書臺

邑庠 張廷範對松

有客飄然憇靜居山陰隱隱結精廬窻開圖畫裁新句石長  
莓苔曳舊裾得意深時無富貴賞心多處是琴書鳥聲漫擬  
江南曲簪屨村烟遠望餘

重九登慈仁寺鞍峰

方道隅砥廉

重九雨何曾鞍峰試且登原田分歷歷焦土折層層日近當  
頭好雲浮過目能幾時甘澤降食價庶無增

同余奠邦宋良遊淨明寺

邑庠 張夢詔

禪關同寂歷到此更清幽柏老囊懸蓋松蒼劍挂虬許旌陽  
憇此有  
挂劍松  
懸囊柏鳥驚雲外客泉瀉石中秋結願香烟冷仙踪自永留

石湖晚眺

熊美芬谷青

獨立晴湖秋石間晚風吹浪細灣灣村烟欲暝崑前路斜日  
猶曛水面山牧笛吹殘疏柳暗碁聲敲罷白雲還貪看暮色  
無邊際沽酒人歸月半彎

雙嶠寺

邑庠 劉運晃

萬仞山頭一刹懸鐘聲響入白雲邊我來誰與參同契別有  
維摩一味禪

柳山讀書臺

邑庠 張志書



一峰高出絕塵埃自古相傳幾劫灰  
司馬何心留勝蹟到今猶有讀書臺

定嘉坪卽事

林鶴問楚

呼童鋤藥去緩步入幽林  
徑曲蟠香草溪深蕩水禽  
撫松耽小憇倚石試高吟  
客少柴門冷歸來酒獨斟

九日同友人獅嵯分賦

李宗陽 滌波

雲鴈度禪關尋幽喜共攀  
牧童斲野徑樵斧響空山  
北拱峰千疊西流水一灣  
登高無限趣楓葉醉中顏

迴龍寺

劉占鰲

修水荒荒去東流迅入河  
岍迴翻浪急市近泊船多  
貧衲挑蔬菜頽垣長薜蘿  
野鷗遊興緩初趁曉鐘過

登山臨水亭

杜中惟

猿猊石鎖大江流特起危亭最上頭  
古閣雲飛紅樹迴遙天鴈度碧潭秋  
四圍風景憑欄集幾輩詩人載酒遊  
西望山城真畫裡夕陽林麓下汀州

獅嵯對雪

歲貢 費鍊華

自愛獅嵯入畫圖更添粉本重追摹  
山寒村舍炊烟靜雲凍園林老樹枯  
流峙分明皆入定高低界劃竟如無  
此來正好參同契白雪峰頭是我徒

四望亭懷古

監生 李和春

突兀高峰壓女墻名亭勿剪繫思長  
綿綿阡陌新禾黍漠漠雲山故井疆  
樵客豈曾迷覆鹿牧童仍自策羣羊  
文忠勝賞今何似又看遙岑下夕陽

足才閣



堂陰傑閣已成墟緬彼吳侯倍悵如觸目一庭荒草滿空聞  
萬卷縹囊儲春風自昔懷廉吏雅韻于今息燕胥安得宰官  
重繼美公庭詩酒疊相於

義溪

邑庠 盛時珍

七世同居號義溪勲名奕葉等雲霓桑麻雞犬桃源古賓客  
兒童錦里齊花鳥一庭饒竹帛風光滿座盡金泥忠君愛國  
更誰並世德堂中擅品題

讀書臺

葛昌園

荒臺一徑翠微通勝地標名自柳公那見詩書依石室但餘  
烟霧隱茅蓬明窻洗盡三秋雨古樹吹殘五夜風幾輩投閒  
橫臥榻滔滔修水悵懷中

遊岷山

山有白羊峰羅漢崖  
巖神石風洞諸勝

吳宇昌 紹文

借得遊仙屐來尋物外天烟銷孤佛出雲暖一羊眠空洞風  
難息殘枰跡自傳奇幽窮不盡斜日挂岷巔

看鶴橋

聶以淦

本是遼峰得道仙翻飛白氅上青天歸來幾處留聲韻冲舉  
何時任往還逐隊征鴻秋月夜營巢乳燕晚風前當年羽化  
憑誰問雁齒橋頭悵晚烟

遊九宮山

國學 吳 黻 蘊堂

十載臥遊天下勝九宮奇境那能逢雲連布水疑飛雨風撼  
虬枝訝嘯龍山上石頭傳試劍殿中遺蛻識三峰註有仙卽  
是堪名處况乃孤高駕萬重

孝井

國學 盛 年 茹霞

朱公孝感漫通天掘井無多已及泉抱甕不勞修綆汲挈瓶



詎假轆轤旋承歡幾輩推賢子并養阿誰愧俸錢甘冽祇今  
稱古跡櫺星門側草芊芊

遊龍潭寺

陳權齋

梵剎鎮江隈尋幽趨曉來老僧披破衲敗壁補蒼苔燈影時  
明滅禪門任閉開夕陽迷舊路幾樹暮煙堆

柳山讀書臺懷古

邑廩 陳鴻幹 掄實

柳峰秀削矗江邊司馬遺蹤尚宛然自古書生能料敵從來  
隱吏即成仙安排棊几尋真樂掛起湘簾豁遠天千載高風  
何處覓白雲繚繞翠微巔

前題

邑庠 陳治方

修江七百勢逶迤絕頂登臨一覽之萬岫碧雲疑送畫半空  
白雨欲催詩苔痕淺逗青紋席草色斜侵綠字碑回首夕陽

亭影裏高山流水溯洄思

前題

陳繼案

抗言曾記謝張公直節森森孰與同風月臺邊任吟咏由來  
宰相號山中

柳山寺

歲貢 張增勳 亘虹

落日映仙關高峰壁立閒人來青嶂外鐘出白雲間寺古松  
遮牖禪空月照山書堂遺址在砌下水潺潺

登青山寺望九宮山

直上靈山縱大觀諸天結構倚雲端磬聲縹緲沈幽壑鳥道  
依稀繞翠巒地脉遠從千里續嵐光高向一峰攢謾言挾纈  
來相訪冰雪炎生六月寒

遊長墅源

黃 湘 橫溪



四面周遭倚翠巒人烟高出半天寒窮源有路崕幽仄野渡  
無橋水屈盤林木霧深疑豹隱溪潭浪靜想龍蟠此間應種  
桃千樹留待重遊仔細看

九日登四望山

黃兆楨 柳塘

崕岫蕭疎積翠同尋幽到此興無窮茱萸插滿登高鬢木葉  
飄斜落帽風遠水長拖秋練白晴嵐高映夕陽紅當年勝跡  
今誰問勿剪重留錦字空

由西安赴章門

邑令 陳瑞球 羅田人

東風吹送箬溪船夾岍垂楊裊碧煙記得年前停泊夜一篷  
寒雪聳詩肩

三硯舟中

晴隰鋪金菜著花炊煙隔樹幾人家支頤坐對遙山雪一霎

風帆到白楂

西安清明

遠烟霏雨人垂楊菜麥風來撲嫩香又是清明時節近五年  
空憶土門莊

獅崕晚眺

李啟元 蓋三

狡狴突兀搏雲出斜瞰寒潭百尺空石蘚斑爛沿淨綠山花  
零亂墜殘紅鶯啼古樹春風裏人倚危崕夕照中閣上鐘聲  
天半落參差漁火起江東

遊萬福寺

生員 鄧匡本 梓儒

山深藏古寺數里碧雲浮曲磴盤空上飛泉瞰壁流鳥鳴叢  
樹裏人立萬峰頭歸路斜陽外疎鐘晚更幽

艾城晚眺

萬朝 西齋



夕陽樓上思茫然望盡東南半壁天吳楚分關橫積翠乾坤  
到眼盡寒烟還林鳥亂城頭樹歸市人呼渡口船我倚危欄  
歌一曲乘風吹入暮雲巔

劍溪曉望山雪

高 懿 近泉

寒雲蕩漾散晴空曉上高樓望遠峰昨夜青山千萬里北風  
吹作玉芙蓉

高屏山

盧定榜 異齋

結屋山腰地不寬兒童伏檻數峰巒草堂無客雲來徃百尺  
飛泉瀉碧湍

舟過中潢

萬邃吾

雨後舟行過石磯雲山隔岫掛晴暉誰家竹裏斜懸網阿婦  
溪頭獨浣衣杜宇聲催田鼓亂垂楊枝帶暮烟飛客中留滯

驚春老西望蒼然返照微

南渡新洲

盧森楊 綠村

舊是城南渡潮平忽見洲岼容如待臘江影若爲秋勢欲蟠  
沙起情還逆水流暮烟橫遠浦人喚木蘭舟

重陽前四日偕陳棠舟鄒小園陳作舟登獅嵯復過觀

音閣小憩

錢塘 茂才 程 綬 研北

爲防風雨阻清游預約登高散旅愁遠水劃開雙塔影亂山  
圍住一城秋棊枰客自誇神手 時座客奕棊 米汁吾將禮佛頭生

長西湖名勝處漫來此地小勾留

重九日同人登四望山歸集評詩讀畫之室秋河令尹

用余登獅嵯韻賦詩疊前韻酬之 錄一

使君冠帶爛同遊特設千觴遣四愁有色香惟桑落酒最清



寒是菊花秋詩盟莫漫爭牛耳醉態難教畫虎頭蕭介文章  
臧盾飲古來一樣美名留

遊太平山及宮

邑庠 楊樹元 體之

凌霄逼漢獨居尊俯瞰重巒子若孫日曬頭痕天作蓋雷喧  
脚底雨傾盆屠杉影影青來砌鼓吹聲聲細入門山色不殊  
風景異何須世外謝塵氛

暮過馬岡寺題壁

邑監 盛 宏 更生

誰識馬岡上悠然選佛場野田紆徑綠苔草沒堦荒磬定雲  
俱寂松吹心自涼蕭蕭人境外閒坐但焚香

一榻松堂靜我來適晷旋高僧能愛客淡月自留人煮石流  
香遠裁雲琢句新閩山如可接吾亦結吾鄰

五鳳山寺

邑庠 王維齡 冠西

一榻松窓下何曾學老禪蘇韓方外契山水靜中緣地似鄰  
丹穴人疑坐綠天過門客朝暮誰擬小遊仙

龍王崖 在下南鄉  
禱雨輒應

余希朝對思

絕壁乘斜磴龍龕望翠微点崖方躡足披莽欲牽衣神像巖爲  
室蛟宮霧作扉一夫當險處升降莫能飛



附列女詩

絕命詞

戴氏婦

惜多才憐薄命無計可留汝揉碎花牋忍寫斷腸句道傍楊柳依依千絲萬縷抵不住一分愁緒捉月盟言不是夢中語後回君若重來不相忘處把杯酒澆奴墳上土

按戴復古號石屏未遇時流寓武寧有富家翁愛其才以女妻之留三年一日思歸婦問其故告以會娶妻婦白之父父怒婦宛曲解釋出奩具贈之仍餞以詞云云事見宋詩鈔但載富翁爲江西人未指爲武寧人有辨詳古蹟

述志詩

盛善才

盛博次女

哀哉妾薄命未歸夫已殂俊魄竟長逝千載永痛呼五倫始夫婦節義信難誣固未通箕箒采幣有成謨仰觀天上月清



光映玉壺在山有義雉失類則悲鳴妾雖巾幗質頗明昔人  
書歷歷古賢烈名字耀金瑤苟能行其志今昔豈不如此心  
常炯炯持以報吾夫

按善才盛文郁孫女許配仁和潘有成未字成天死才奔  
喪會水淹舍漂成屍才痛哭欲絕遂自矢貞守晚以姪孫  
珏妻李氏新寡召之賦詩李氏有誓章與爲綢繆勉以苦  
節詳具列女傳

哭夫

自聞失所天腸中鹿盧旋此生已望絕相見或黃泉泉路窄  
難測猶及撫哀筵謂當薦血淚以慰鬱離魂豈意靈雨惡水  
勢忽奔奔魚族宿樹末日月遂冥昏零魄竟不歸沈怨在干  
年河伯何太虐天地亦嗚咽金石雖銷毀此恨終古然悲風  
來四野惻惻不忍言

答李氏

人倫久荒沈風雲遞變滅今日城南妻明朝城北妾畧不念  
舊恩曲取新人悅及其意思盡回首成秦越賤骨委黃土干  
秋莫能雪此理竟誰明與子存其說

哀詩

李氏盛珏妻

結髮爲夫婦三載到于茲君旣歸重泉豈復有還時空房琴  
劍冷廐馬衰哀嘶羅幃春生寒膏沐奚忍施幽明永隔絕千  
年無見期在君之精魄當化壁與奎燦爛青天上照耀修水  
湄妾抱萬古恨沒命有餘悲願言存大節不受古人非

誓章

清清江中水皎皎天上月水色與天光終古無緇涅唯姑有



正寧縣志 卷四十三 二百九十  
素心與之方皎潔厓懸葉婦頭磚漬譚氏血邈矣二賢媛萬  
季稱奇節唯姑無岐志與之厲貞烈妾亦未亡人况復承巾  
櫛生雖不盡歡死則義同穴守節分所宜立身貴察察亦以  
正性命安問茹冰雪

附仙釋詩

華表歌

丁合威

有鳥有鳥丁合威去家千年今始歸城郭如故人民非何不  
學仙塚纍纍

按飛天仙人經丁七歲入山求道千年化鶴歸鄉下華表  
歌曰我是昔日丁合威學千年今始歸歸云云與此開端  
稍異因互訂云

和靈源寄瑩中

釋德洪

此來漸覺身無累欲學瀟溪諱名氏鍾山萬頃獨經行山日  
松風吹凍耳聞有僧從法窟來當鋒戲作橫機試探懷示我  
妙伽陀兩翁回護偏中至乃知道德無貧賤邂逅相求亦相  
契妙談何日看揮斤此老鼻端有餘地



和清上人

駒兒墮地已汗血毛骨蕭森落眼中今見馬羣方弄影會看  
雷電疾追風龍媒何止十倍價凡馬終當一洗空我是道林  
能賞駿識君語妙到無同

在百丈寄靈源禪師二首

暗中樹影平生意水底魚蹤病後機想見道容無住著倚藤  
閒看暮雲歸

平昔追隨骨海心暮年粥飯竝叢林揭來萬事撩人笑此去  
青山爲我深

獅嵯晚眺

雲峯青湘子 凡仙

修水多奇石惟有獅嵯好閣開千里日登臨羨絕倒  
夜靜寒潭碧雲山面面新來遊艾子國却少問津人

清明郊遊

元教 李蓮雲

白紙山山在江流有盡哉但聞新鬼哭那見古魂來

柳山

僧雲蒼

欲辨真空獨出羣登臨如此勝云云烟光落地連千頃山色  
留人到十分藤杖橫挑孤嶺月詩瓢歸貯萬峰雲心腸已放  
虛無外剝蘚重看石上文

龍潭寺

僧雨松

咫尺龍潭人影幽桑門真個畫圖收風來石徑塵皆掃月破  
疎林翠欲流佛壁重新宏淨土禪心初定泊虛舟閒時說罷  
無生理幾杵鐘聲物外秋



武寧縣志卷之四十四

武寧縣知縣閩中陳雲章纂

雜記

山川曠盈今古遼博孰竟其藏孰啓其鑰石室蘭臺紛焉研索耳治目收鴻纖互託意在勸懲亦莊亦譎夷堅諸臯徵煩取約是日說家義類炳灼做帚適用雞肋堪嚼瑣碎紛龐治而不削廣彼前聞毋傷穿鑿作雜記

伊叟秦時人避地武寧山中嘗於石湫拾一卵大可數升五色晶瑩異而伏焉歲餘產一龍僅尺許鱗角差具養之湫中甚馴狎後叟死鄉人瘞之宅左此龍盤旋墓道狀若悲戚是夕風雨大作湧溪石爲叟成墳而去其石壘嵌甚固至今馬鬣若新



按袁州府志盧肇記唐時有温媪者經程溪得巨卵  
藏於家生七龍放之江媪或至江口龍輒獻嘉魚媪  
死葬程溪水衝擊一夕雷雨遷之高岡鄉人因爲立  
祠額曰孝通廟事與伊叟相類伊叟墓石壘嵌甚固  
尤爲奇特

修水源出寧州西鄉黃龍山東南經州治又東經武寧縣  
治東北流數百里至海昏又東流百餘里入彭蠡湖郭  
璞記云有水名修有魚名儵天下有事此地無憂言可  
避亂也儵魚狀似青魚廣首長脣味極甘雋而脣尤美  
然至建昌炭婦河則絕無矣

縣東南八十里有山其峰高聳天矯如龍世傳漢末爲孫  
鍾種瓜之所瓜美有三仙造訪輒遺以瓜鍾母死未葬  
三仙感其惠復來謂曰承公厚意今爲公母傳善地惟  
公採焉再世三世必大貴鍾唯唯回視三仙化爲白鶴  
飛去遂葬母於此後生子堅靈帝時爲長沙太守封烏  
程侯堅生策建安三年爲討逆將軍封吳侯策弟權稱  
吳王尋稱帝位傳六世因號此山曰吳王峰墓曰吳王  
墓

縣南三十步有腰帶水源出神童山爲縣脉西界水從西  
門入江明宏治間水衝決經臥象橋穿縣治入修江嘉  
靖間知縣唐牧障復故道尋決崇禎間知縣寇可教仍  
行障復

國初知縣任天祚改入縣治流至東水關入修江讖云水繞  
縣前流官清百姓柔



正宜縣志 卷四十四 四百六十二  
宋時車翁者厚貲產無子以其貲委壻就養久之壻漸厭薄遂還家抵暮至其莊莊人訝之詢其由壻曰翁視聽未衰尚可圖後盍歸而納妾莊人徐姓有女及笄而未字向德翁卽於是夕以女侍焉時翁年七十後單生三胎孿生三胎翁嫗各得年九十餘構樓屋九區分住九子至今稱九樓車氏云

瀧溪荷墩有宦塚相傳徐尙書墓土人發壙得銀簞古鏡其鏡陰有湖州真石家念二叔照子十字字如栗大徑圍可茶盃許古意瑩瑩然不知何代物也簞織以銀絲絲細如髮工緻精密化之得四十八銖

伊山石湫中產龍鱗首有角鬣隆準豐脣悉如龍形每以秋分前後隨水湧出委積無算沿溪居民用簞畚羅取有得數斛者鮮烹乾脯味皆甘美過此數夕卽不可得遂相傳爲龍鱗云

武寧山壑深廣屢有蛟患每春夏蛟發輒冰雹大作溪水溢溢冲决田土甚則漂沒廬舍人畜其害猝至莫可逃避

黃山谷外集崇寧元年書蔡秀才屏風頌四首有曰武寧縣中蔡老子能碁能酒又能詩胸中百萬多羅織不向人間說是非又曰接人高下但唯唯又曰此翁家世印纍纍當時不書秀才名字玩其語意蓋亦遺世棄俗之流且其家多宦籍及稽武寧蔡氏譜宋代人物無一有者卽秀才之名亦不得知古人湮沒無傳何可勝道其頌辭頗屬率意今不備載



龍潭清影四字舊志載黃山谷書鑄於石上今石壁存者唯曲江謝存理篆有龍潭二字向東相傳山谷所書四字臨潭向南沉水不可見有捕魚者識其字或水涸甚時俯窺之隱隱有字跡云

坊市陳以經字元常建書屋於東南城外夏堰寺旁會文者衆以城門啟閉有時雜選不一請開東濟門門高八尺廣三尺今塞遺跡尙存

宋景定時余榮叔家巨富有幹才能辦國事遇寇警朝命王珏出征軍需不給榮叔傾貲助事聞予以官不受上益嘉之召見賜宴勞復寵以詩歸老昇仁鄉没年八十有奇在元至正己丑歲詳見元譜今其後裔吏員一棟呈先朝舊牒洵堪徵信故錄之以示勸云

三聖廟都司線坦建其初分建於營署之左右祀關聖馬王火神坦到任謁廟蹙然曰此非所以妥神靈也宜速更之坦出人過廟欠伸起敬一日自建昌道中挽舟上忽有聲如雷舵陷不得脫泅者沒者自下曳之則大木浮出凡十二株堅好如新坦喜曰神賜也再拜稽首遂運歸以建斯廟楹柱悉給焉廟在署外見祀秩

昇仁鄉冷廷珪十歲遭亂德祐乙亥元平章賽典赤得之愛甚命次夫人金蓮養以爲子平章被謫籍沒珪力明其非罪得全乃歸省生母至元壬辰率族黨重創義門賽典赤爲請諸朝命學士李溥書冷氏義門旌之義門蓋其先代所有也

元至正上南鄉芭蕉寺貢花木瓜入宮后秘愛枕之傷其



正寧縣志 卷四十四 四百十八  
首上震怒詔廢其寺禍及諸宮觀見玉清碑記其地至  
今日芭蕉故老猶傳其逸事云

元至正末石市熊姓聚族甚盛其鄰人某兄弟有膂力以  
析薪自給一日大雪熊有富人置酒樓上集子弟吟賞  
鄰人曳敗絮負薪過樓下熊見之憐其寒命僮召至與  
之卮酒且笑曰若兄弟身長七八尺而不免饑寒是泥  
牛耳鄰恚甚挾竿往見胡紹遠紹遠壯之署爲首領除  
夕率數百人圍熊氏宅夜半舉火焚殺一空獨新婦朱  
氏有五月孕時正歸寧產子伯雅遂依母家辟纊養子  
後鄰人兄弟死於兵始歸而復其先業石市之熊皆伯  
雅後也於戲一言之肆禍及宗親而伯雅母子卒以節  
孝大其族天與善人豈不信哉

長墅原虎亂有孫曰棟者曰吾聞人受虎殺則爲佞鬼每  
導虎行虎擒人佞剥衣以待虎食遇有機陷引虎避之  
佞何愚甚若虎噬我我必爲厲鬼以報越日其人竟爲  
虎害妻啼於室曰某地有機子有靈當圖之是夕虎果  
斃於機

熊埠灣李氏巖頭楊氏皆善格虎其敵虎之器戈矛外有  
鐵涼傘每遇虎張口搏噬則以傘投入虎口反拽之傘  
張不得脫挺刃而前若殺羊豕又有李五叔者尤能測  
虎進退刃無虛發前後手斃十三虎又獨殺二虎倒曳  
而歸其人形體短小又接物甚醇謹不類猛士云

石市民唐姓者抱養一媳年十一生一子十三又生一子  
自後絕不復孕又龍石黎氏婦年五十六舉一子皆康



熙初年事

南鄉葉生某赴省試行至靖安遇雨借宿一農家兄弟皆客外娒娒二人守室其娒堅不允留娒重客文士又日暮無投足處強止之令宿於堂且命其子從客投句讀夜半雨益猛葉生臥一長几心煩不得寐起坐几上俯視地忽裂一縫深黝中有光二炬大如盤火燄迸出生大恐急呼其家走避不聽破壁而入挾其子登山母亦隨出轉瞬雷電轟繞室已成澤明日有自下流來者言其娒竟死於水云

邑舊有跳神之俗其爲神所憑依者曰馬脚亦曰降童民家迎神童必從巫誦咒作法童則顛顛騰躍起作神語夫人疾病禍福鄉民多聽命焉凡神擇人而降衆召巫作醮事合舊巫傳法於新降者鳴鈺擊鼓一村若狂謂之駕馬脚乾隆丙辰東門外有神降於人巫者侈其事衆益奔走相與設壇演法邑令吳使尉夜往偵之至則燭燎煌煌巫仗劍指揮降童方赤足踏火輒觀者如堵尉卽輒上鎖降童并逮巫就理自是跳神之風息矣

上都余文行幼孤明末賦重力不支將避地以圖存臨行老僕有仁年七十餘匍匐階下泣曰幼主有老母在義不可去余曰大尹徵求峻急鞭撲之慘女主人不能受也僕曰吾聞大尹雖峻於刑然立斃一命怒應少弛幼主人能留老僕不敢自愛其死衆皆壯之且疑之後值較期僕竟往尹大怒杖之百僕俯首受不發聲尹曰何物老賊敢強項乃爾僕曰非強也代幼主受杖出於至



誠不敢以呼號之聲上瀆大人尹誥之僕且以告尹爲  
出涕曰此義僕也命之起厚卹之後尹雖盛怒見老僕  
卽霽顏所解救無不獲免文行家竟賴以全

王國珊明末富俠遭鄧雲龍亂夜縋城請大兵誅討卒爲  
雲龍所殺比葬家人具十二棺置疑塚於藿溪山相傳  
棺內藏金有閩人夜往發塚竟死其處珊碣頭人雲龍  
嘗脅以僞劄不受真義士也 全上

明成化間邑人高希仁有贈宛平主簿石鏗詩云舊山松  
竹深開逕滿甕蒲萄暖泛春留得洛中風韻在我來何  
日接芳隣時高君亦在京師玩其詩詞襟懷亦自灑落  
而平生行實里居皆不可考矣鏗字大宇田坑人

嚴陽山有石筍高十餘丈又有石柱高丈許大徑數尺其

上疊石十三條皆方長丈餘琢磨端好俗稱掇石云是  
善信尊者所疊然亦不知其何故也

梅岬夏銘明成化間入宮侍讀日親近上篤愛之銘性忠  
鯁不爲阿媚有古巷伯風歷事三朝恩寵備至及沒勅  
賜國葬其棺由巾口入小河不克進相傳水驟漲遂達  
墓所嘉靖勅文其姪指揮依禮奏疏石刻猶存墓上明  
季流賊利墓中所有甫啟石雷電交作乃止

縣署內祠王夫人靈爽甚著萬歷間一商載重貨行至三  
碕灘半猝遇暴風帆檣顛覆獨商舟獲濟其夕商夢二  
青鬟召至一所庭宇巍峻一冠帔貴人上坐命之曰以  
汝有陰德於人故得免此大阨當力爲善毋自暴棄商  
拜謝退旣出回視門上署額乃勅建王夫人祠六字



昇仁鄉余登瀛工詩文由萬歷副榜轉天啟間貢自恨未  
登賢書賚志以歿歿後數月族人某暴死復甦云到一  
處村落人烟身所未歷中途遇登瀛握手慰勞如平生  
有頃鬢蹙曰此間非汝所宜至可速歸取旁徑送之且  
貽其姪庠生復亨訛云一榻松風下茫茫萬里山秋雲  
看世事榮落不相關族人業農不通韻語非能造作此  
訛者語畢復沒

安樂鄉松墅李元德生平不治產年五十操器出門開治  
要路境中紫鹿青牛兩處最險隘元德獨力平之三十  
年未嘗輟每攜寒具止宿巖中有虎當巖坐相忘也又  
嘗於峽要上開鑿峭石石發傷其足創甚風雨尤楚然  
治路不少休七十九時遇葛巾褐衣者於道曰明年元  
旦來已若創至期道人先在出葫蘆中一杯飲之創良  
已或以爲神賜云元德死其子愛青踵之有父風

坊市盛瀾澹爲人豪俠不治產揮灑如意善岐黃得針灸  
秘傳手至立效每出金製藥餌不計值人爭重之一時  
自丞尉以上皆與澹作布衣交獨於邑令王掄士厚且  
久未嘗干以私令益敬澹澹如故後令以帑虧被議卒  
於寧旅櫬寄蕭寺窘甚家屬累焉澹力爲經畫彌補如  
令在官日及歸復贈百金邑人咸高其義云

武寧向屬巨邑編鄉二十唐李巽奏分武寧西八鄉爲分  
寧南唐時復割縣南地以益靖安後併昇義入昇仁鄉  
此九鄉所由昉也分寧爲縣爲州沿革不一與武寧均  
隸南昌修水發源寧州沿流至武寧及建昌一水襟帶



夾兩郡而滙左蠡雍正年間有以寧州轄武寧書上各  
憲邑廩生盛世麟監生張邈夫等力爭之懇吳令申詳  
事遂寢

紫姑仙乩仙也降筆言休咎至後始驗所爲詩詞皆奇雋  
可喜每盛宜仙禱之輒應宜仙死仙遂去乾隆壬午復  
降屏山盛氏有仙曰青湘子松風子及鶴亭閔道與學  
士談詩文酬唱甚盛後名仙頗多或懸筆作大字蒼古  
勁逸迥出塵表求者隨時直書多名言格句足備箴銘  
又教人行善事及修煉養靈之法然必得庠生黃雲嶠  
至始降亦大異也

長樂鄉余汝錢字定谷性淳篤有孝行童時失怙痛哭不  
食者數日母患頭疾三年醫藥罔效錢至誠愷惻奔走  
數百里禱靈神獲愈後病復作垂危舉家惶惶失措錢  
焚香禱哭割股肉和藥糜進母遂霍然而起曰方夢見  
閻君謂我數盡念汝子苦孝當延一紀逾年果如所夢  
亦足以見匹夫愚誠感應不爽云

西關有四望龍潭諸勝蹟登臨者徃徃流連不舍乾隆癸  
未後自大小西門至南門平砂細石隱隱一線越數年  
如練又數年大石小石磊砢沙際遂成新洲縱橫約千  
畝環抱縣治河水繞南岬如帶人以爲地脉之靈云

按盛孝廉牧南渡新洲原唱地勢滄桑變天然一小  
洲沙痕纔映雪水氣尙涵秋賈客喧中渡河源繞外  
流垂綸思徃事閒坐待漁舟此一徵也因附錄之  
入都石言出身行伍白頭兵寇武寧城言奮力當先斬獲



甚衆都統朱奇其勇委令開路所至有功嗣撫軍董克復銅鼓言隨營錄力報功授本營把總見秩官志

鐘鼎山有丹曰在黃婆洞最深僻處長二尺許廣尺可搗藥又玉清宮旁有丹井圈跡世傳玉清丹畦卽此舊志僞撰呂巖詩問我身從何處去蓬萊頂上會神仙大可噴飯宮中道士鑄之石壁盛于埜戲題石壁云我來汲取仙泉水濺盡千年石上羞

舊志豫寧八景最無稽曰甘羅故居新志作唐宋時甘羅二姓者近是次之三硯怪石事涉荒唐抑有何佳致而列於八景耶且諸詩皆鄙俚識者嗤之新志概芟易以山水雜詠較爲大方然八景之說自京師至府州縣徃徃見諸吟咏何也若以鄭郊草堂配柳渾精舍風流

宛在他如玉枕清風鶴橋明月鍾陵瓜圃伊洞龍鱖至今相沿不替而意興所之尋芳步勝則又有南浦漁歌東林牧笛足爲風雩浴沂者助也復軒盛學鬯云

太平山嘗宿重雲好事者于雲深處置缶貯盈以帑封固挈之下山出酒席間刺其孔雲裊窈而上縈蕩竟日不散又山高寒積雪至五六尺彌月不能行康熙間有道人至宮中赤足趺坐閉目不食數日忽失所在蓋遊仙也

破石日休堂不知建自何人何代鄉里釀金構義塾卜地於石湖之南得古碑橫額有日休堂三大字其下小字多漫滅可識惟詩書種子才之難若此八年長至株村十五字而已舉義者同村盧全萬王孔焯孟權孟元文



乾梅良珙六人云

盛西園名林讀書能文屢應童子試不售以過勞得痰疾嘗於舟中作詩云同人鼾睡一燈孤月上篷牕獨照吾灘水秋來知己淺病愁深結繫蓬蘆竟以痰疾卒示凡云當年遺恨一杯孤雲水蒼茫孰故吾秋柳春花常過眼祇愁依樣畫葫蘆後其孫時珍質敏異早年入學亦不永其年邑人惜焉

南鄉石門山石罅中有桃樹一株僅數尺枝條蟠結如蓋花實甚繁相傳自然真人章權孫手植土人取實種蒔百顆不得一苗亦異事也

樹德堂坊市張機宅明益王筆跡書法古勁至今巋然宗裔庠生廷懋及弟廷楷居焉懋伯仲友愛怡怡一堂擁

書自娛塵囂不染嘗顧謂諸子曰吾家典型尙在也爾曹勉旃又嘗構異方治人痰核多奇驗製藥施濟一無所取遠近德之楷子鳳英會勲俱弱冠補弟子員

昇仁鄉聶公旭女幼許字同鄉葉宴林有某與其父有隙以不白事污其女致葉人棄婚女含屈不能自明幾死泣告其父曰事旣如此若適他人是受污無已時也誓當終身侍膝下旭故遺產給之有餘輒分與兄弟及修橋路茶亭不使有餘年八十無遺議鄉人知其冤咸嘆服焉其後誣者乏嗣

香雪亭在縣尉署西董永錫建邑令鄒應元題舊有古梅一株大可數尺圍亭亭如蓋冬春間梅花盛放飲酒賦詩其下雅韻幽香徐徐入座間尉族董作棟少負才名



自浙來署與邑中知名士吟哦亭上流連不去作棟號  
幹夫戊戌成進士

柳山陰有月嶺修衍而平明末張秀才穀嘗於此疊石成  
陣以禦寇穀遇異人授陰符秘書考象驗事洞鑿不爽  
往往假黃冠出遊方外後人因名嶺曰疊陣嶺

新豐寺有銅佛高丈餘廣六尺佛陰字刻載一萬八千斤  
明成化六年萬宗澮熊伏瓚諸人助鑄

南鄉羅穆美鬚髯工詩授徒夏庄作九子吟愷切悲惋嗚  
咽欲絕遂得病翌日筭輿舁歸病月餘復起乘輿往夏  
庄與九子暢談古學大白三浮曰吾不復來矣遂歸是  
夕竟卒卒時口占新句云學不到神仙何處容吾武

甲申流寇充斥大隊屯魯溪舉村逃匿穴洞其資橐薄者

散伏林莽間游騎四掠殘暴不堪路經拖兜洞劉姓丁  
壯悉力攻之發檀砲殲十餘騎寇奔駭哨聚一時蜂起  
雲集凡穴處者莫不避鋒深入賊愈忿折屋材縛衣絮  
聚糠粟穴口委積如邱環以風車鼓烟焰以薰灼之凡  
山有十餘穴穴所容多者二三百人少亦百十餘人莫  
有生者時劉氏八十人潛瑤門洞洞門窄徑二三尺許  
計以水綿塞之可禦而賊攻之且速劉璇甫及門輒冒  
烟而死延兩日夜火燼賊解劉璣以外巡得免尋至洞  
門得其兄璇尸復入越大石門丈許燭之惟大士座燈  
殘若螢欲滅不滅急張以火見祖母在大士座前父抱  
其左母抱其右環膝壯幼十餘輩昏迷如睡莫能語急  
予以湯方甦遍閱其餘爪秃髮結額破血流者得湯亦



生徐問以故云穴烟大入氣鬱逆觸土著崖彼此衝擊不能已唯大士座前勢小殺不覺其慘云

流寇之亂有渠魁者以殺人爲戲日驅童子分跪道左每殺一童取刀插其前渠躍舞良久拔刀取首首落大笑以次相及無有生者最後一童度必死不如轉弒伺渠舞時急拔所插刀砍渠足斷而仆遂疾趨得免諸寇見之皆拍掌聚笑云

巾村李氏枕碧山上有七人墓相傳順治元年同鄉人擊自成餘黨不克死之因纍瘞於此山三面枕池松櫟陰森至今猶英風凜凜云

江陰鄉鳳口鹿頂廟側有古樟二株高十餘丈圍廣丈餘枝柯俯仰交映有雌雄狀客有將二百金圖此樹者夜夢神人謂曰予安此地久矣汝何故見害明晨客攜匠往忽雷雨交作鋸斧不能施及霽得殘石鏤有公母樹三字遂止至今爲潘氏公蓄

登高山李斐字浴弦後街張達源字放泉均邑諸生年相若少同師事學博盛鍾靈爲文清新奇特一洗卑靡習氣邑前輩余比部盛明經咸許可之斐性耿介不喜豪華鄉里子弟有拂意者面叱不忌源稍純和而賦性冷落戛戛獨造然皆困於場屋抑鬱數十年喜酒相遇輒飲飲輒醉稱莫逆交杜工部所謂酒中仙殆其人也

王夫人祠在縣署內東偏正德間奉勅建者時華林賊猖獗官軍莫能制知縣毛丕功夢夫人授以方略明日臨陣又見夫人冠帔行空中羽扇指揮賊遂大敗旣奏凱



以其事聞遂予廟祀數百年來屢徵靈異順治甲午春  
祠下產芝三本秋闈中式者三人

邑人姓婁者康熙初年賈廣西欲至舖家索負五更起出  
門天尚黑忽見前路白光如日謂天已曙矣前行見一  
亭過亭復有一橋度橋入黑洞中不復辨去向但覺腥  
穢特甚水如潮湧將身滾出於外昏迷不省俄而天曉  
漸甦見大蛇尾如山迴旋而去身尚偃臥不能動行人  
見之詢知其故舁歸主家身已腐爛歲餘方平復滿身  
蛻殼膚如蛇皮矣錢塘徐子靜爲奉新羅坊巡檢在南  
昌見其人自言如此

江陰鄉父子操舟者泊舟河灣天雨雪將暮有麗人倚舟  
泣曰妾爲姑逐無所歸對舫有母家幸假舟渡以全妾  
命操舟者憐而渡之泊岍雪益盛促之去麗人又泣曰  
母家山下距此三四里寒夜一婦人難行乞舟頭坐一  
夕舟父不可麗人哀惋嫵媚有餘妍其子心動姑止之  
夜與其子歡狎黎明竟踏雪去已而見雪上有女跡微  
露蹄影其子循迹逶迤行數里至山上遇竇跡滅審視  
則一狐熟斝竇中遂擊斃之

七峰張秀才居山性關佛老遇土木像輒毀之西北鄉喜  
淫祀聞張秀才至則匿像於室往往搜而毀之又性迂  
嚴每妻子有過則臥床不食數日必待妻子跪床前悔  
罪乃食嘗曰刑于寡妻大難也然好遊山制小車可陟  
降不顛仆遇好風日則乘之遊至暮不倦云

瞿梁石路陡峻下臨仙人潭有岷高數丈橫亘畝許向鑿



小磴通往來每遇陰雨積雪行者自岨返邑人李啟喬  
費數百緡修治凡八閱月剗削未及三之一忽晝晦諸  
工登高鑿險聞空中人語曰走走俄而雷雨交作潭水  
沸騰工倉忙趨避而懸岨崩裂遂成坦道人以爲有神  
助云

下南鄉萬孝廉廷彩以湖廣布政司副使致仕既歸召故  
人子弟終日會飲嘗以二疏自况著呆齋詩文皆散亡  
不可得及年九十賓客盈庭洗爵以獻願先生賦詩自  
壽彩口占六言曰官至參政非小年登九十非天田園  
我買我賣世事勿曉勿曉其精神強健胸懷開拓類如  
此

花棚柯性剛少孤以采苓爲生供母後遇異人傳得外科

秘方所用刀藥皆奇驗性至孝爲母祈年食長齋人號  
曰柯齋公及母患癱症剛親侍膝下任求醫者皆不出  
度其可返而後去有富人以重金要致百里外剛辭親  
友勸之行剛曰吾舍母吾早以技致富矣卒不往

汪指揮不知何許人其年代亦不可考康熙間順義鄉人  
附葬穿穴得竇視之則見土室高廣方丈磚石四周中  
有石几列盤盞作供狀其盤盞皆古瓷器也

康熙戊辰南鄉陽坊田中崩出元至元間墓碑額篆陳孺  
人王氏壙銘七字其文有慮夫滄桑遷變仁人君子見  
而掩之所深望焉謹爲之銘志諸幽之語里人遂爲封  
識

康熙戊辰四月十七日烈風大作山口張氏受禍最慘宮



室悉飄舉空中四圍牆垣飛擲如亂蓬參天大樹掣向  
大江去一村死者凡三十人壯者膚剥骨脫或兩臂抱  
頭而死幼者吹入雲間墜若瓦解其殘息尙存者十一  
人皆脫落附折昏迷不省真山鄉亘古未有之奇變也  
邑秀才蕭露瀼有烈風吟以紀其事

上都余宙明性至孝力農灌園以備色養其父老病閉結  
不能如圖明手爲疏導燥糞者十餘年

昇仁鄉汪惟玉時年踰五十無子然好善益篤里有石橋  
自鳴三日而傾汪欲重修囊中又無多金因求助於人  
以勸不逮時某某許之汪喜曰橋可成矣後碑紀名爭  
主修某竟分文不出汪售物產給工去越歲汪竟舉二  
子蓋亦爲善之報云

宋進士楊友龍有手卷畫三百餘人皆同榜進士每人胸  
間註其地里姓名冠服井然康熙中嫡裔持以質穀有  
覽其圖者云楊進士貌豐潤微鬚年可三十餘以見宋  
時士氣之盛留傳數百年其意象尙可憶念也

鄭山人蓮池或曰西郊四望山下或曰縣東看鶴橋側今  
呼荷花塘是也黃魯直過草堂詩曰開徑老禪來煮茗  
老禪謂延恩師法安又曰還尋密竹逕中歸則知草堂  
於寺不甚遠也延恩寺舊志載在尊賢坊蓮池似應屬  
縣西古人遺跡難考如此

武安山多勇健最著者曰彭鶴能腋兩笠飛離縣十五里  
頃刻往返山上皆稱爲鷓曰劉野猪黑面長牙首可觸  
千斤曰李拘騾力雄嘗乘騾策之不捷遂以杖荷騾而



行若舉羽然曰盧虎咤叱如虎聲震山谷聞者股栗皆一時之豪盡殲於麻潭陣唯聶潮玉得免焉

康熙庚寅邑多虎患城東有貧家子兄弟二人往樵甫入山兄爲虎所得坐之臀下其弟年僅十二見兄呼號且哭且詈追至虎側奮力一砍正中其鼻虎斃而兄竟獲全咸以爲精誠所感有神助云

康熙丙申邑大水有徽商者吳姓遺其名載鹽五百餘泊武寧中口繫船大樹下水益漲兩岍居民呼號乞命吳商聞之趣舟子往救舟人以裝重有難色商卽取鹽投水中甫解纜其樹輒仆舟子感動併力度人全活甚衆太學生王崑秀年四十餘無子夢一老人詔之曰馬鞍岡上有三子盍往拾之旣覺卽往其地聞茅舍中哭聲甚

哀詢之賣妻以償所負夫婦不忍別且泣且愬生心動亟止之代償宿負且厚卹其家而去明年正月生婦舉一子十二月又舉一子側室亦生一子一歲得三子竟符所夢

潘士學少時讀書別墅與狐仙竹青遇久之益相親暱家人怪其狀詢之學具以實告家人曰妖也當治之明日竹青至謂士學曰家人謀治我耶今當別重會在江城學詢後事曰兩廣仙旣去學怏怏失望計無所之遂遊江城會金聲桓畔大兵圍城食盡主者將害之學心動祝曰竹青救我須臾狂風大作仙攜學往墮軍營主帥見而愛之視學如子攜之北上後以原姓名中順天鄉試仕終湖廣廣濟知縣果如仙言其子姓遂歸旗焉學



正寧縣志 卷四十四  
為潛儻後儻以進士官知州祀鄉賢祠

丙申大水寧州一女子坐床上泊楊柳灣手提囊金呼漁舟求救漁人給合擲囊竟推其床泊浪去後得金構屋立焚且顛沛死

雍正己酉七月中吳王峰頭雷電旋繞大雨如注空中見火光激射莫測所以明日山下見一獸巨口方額體被綠毛長丈許大氣氤氳不敢近蓋犴與龍鬪不勝墜死土人坎而瘞之

北山岬僧爾建病洪鶴齋往視之僧曰命盡今日卽治香水澡浴趺坐四圍積薪命舉火合掌誦經而逝遂建塔塔上有光達旦數月人以爲舍利云

雍正庚戌春石口熊氏厄痘疫村內半月殤三十三人競傳痘神爲祟怪異多端舉村驚怖士人熊墨園作討痘神檄其略云正直聰明曰神天地好生而乃戕滅生人是邪昧物也不已吾將沈而於河其無悔時墨園一子方歲餘覽者皆搔首吐舌妻泣涕諫止不聽亟取檄向空中焚之其後疫遂寢同里痘童皆安好而墨園之子竟未傳痘

雙嶠山溪水南流遶縣東門又西折永慶寺前與修水合溪東南曰孟家灣地勢窪下或山水驟漲往往橫流入灣民謠云水走孟家灣黎民逃上山蓋本形家水破巽方之說往者縣尹令鄉民插楊楹以爲捍蔽歲久樹枯其地漸爲民侵墾乾隆三年衆聲其事於邑令吳始清出公地周植楓杞復蔚然成林矣



丞廳內署有香木瓜一株高數丈霜皮斑駁枝幹奇古花似海棠而香甚清越結實雖繁然易飄墜秋颺起則枝頭濯濯矣每遇解試之期邑人以果實去留占入穀多寡亦復奇驗

乾隆戊午大風雨雹大田鄔家有物吹落屋上雨霽取之則牙笏也鄉人駭怖競傳為龍王笏請巫禳祝投諸修水

乾隆庚寅六月初二大雨平地水深丈餘漂沒昇仁鄉明經周某及門人八鄉人數十委隣縣臨視賑恤有差

昇仁鄉有獵者夜夢一老人曰而能可相我及覺獵者怪之明午天晴耀獵者入山忽大雷雨避古樹下雷環繞其樹雨如注獵者驚怖雷益烈微窺樹中隱隱有物雷

自上怒擊其中若有黑氣如霧上騰雷逡巡而退獵者祝曰必欲我相雨微殺乃可展力少頃雨漸細雷方奮擊獵者自樹縫中發藥黑氣不得上雷盡力一擊乃斃天大霽視之則一巨蜈蚣也

明經黃夢鶴之子名某讀書有膂力夜半已睡聞門外有聲啟門則虎已入半某當門力拒之室中妻子悸怖股栗乃疾呼曰起起時某左肩壓門右翼妻子登樓力將乏虎遂入室與虎相搏自室至堂家人益震駭某曰毋出吾可獨當搏之益力虎躍牆頭墮復鬪酣戰一夕虎疲由短牆遁去鄉人稱為黃食虎云

嚴陽山有猴攜子巢大樹上母中獵夫藥垂危顧子下淚抱乳久之又掇樹葉裹餘乳以飲子低徊不忍舍忽墮



地而死獵者心動遂終身不復獵

仙人潭有巨蜈蚣吐涎如長虹掛石壁上是年遂有大水其水之大小視涎之高下如則而止康熙丙申乾隆丙寅涎最高云

藍田朱謙嘗過九宮山遇驟雨臨溪見一僧招之曰急渡謙從之甫登岨水大至及踵疾趨得免其僧不見謙子方七歲是夕夢有僧脫父難覺白於母及謙還詢之果如所夢

坊市汪之東一名乾山長於詩畫歷參南昌南康二郡椽兩太守皆愛其筆墨稱曰今之摩詰流也年四十卒

昇仁鄉聶允元以諸生入大學善琴每於山樓月夜彈之音韻幽絕聞者以爲鶴唳近年屋後掘得一石床古質

蒼潤相傳爲允元故物蓋已二百餘年矣今藏太學林材順家

黃茅尖在縣西數里山頂有廟祀盧仙姑廟前有古柏千餘年物也相傳仙姑手植雍正末一夕枯落殆盡至乾隆乙未忽發新葉嫩枝柔條葱蒨如故

周中峯墓碑爲人掘置池口陰覆其字一日婦人坐碑上浣衣歸病且危有神降於庭曰而辱周進士罪不宥家人惶恐稽首請罪不知所爲已而降神者忽奔池上肩碑疾馳插於山上乃見其字中有貢禮部周中峯墓七大字上闕數字旁有少中大夫江南諸道御史臺治書侍御史王家綸題二十字

乾隆丙寅大水寧州漂樓屋過縣南門時方漏初樓上燈



燭煌煌呼號乞救兒女啼泣聲不絕迅濤飛射不知所終

某鄉有婦不順於姑姑白於子子頗護之婦益詬厲子不能禁姑老且瞽婦以殘食餉之既死婦猶讒姑短一日雷電繞室梓夫婦跪堂上良久子甦忽挈婦於姑塚旁擊死

國朝水災莫甚於康熙丙申其次則乾隆丙寅兩水之發皆在五月朔日相距三十年時刻不爽

朝廷軫念民瘼例得報災兩次皆蒙發賑井里安堵不至流亡亦藉賢守令之力爲多云

昇仙觀夜半鐘鼓自鳴聲振林麓睡者驚不敢臥少頃雷雹風雨交作屋瓦丁丁然如有物負之以徙者天明雨

止道士啟門則兩旁皆成溪矣時乾隆戊辰七月二十八夜

東鄉黎國寶常過僻谷孤舍見一僧坐堂上酣飲又室中隱隱有婦人泣聲旣行且暮黎語同行曰僧必有故盍往視之同行有難色黎乃獨返至則婦人赤縛榻上僧將據腹取孕矣黎叱之僧遁去婦乃得全

塘盤李名某將鬻豕屠者持金佑直約明晨屠豕去李置金枕下以事他出次日屠者至李妻往厨治湯屠者乘間入室攫金屠豕飄然竟去比李歸索金不見以語諷婦婦恚甚遂縊而死李大悔恨入城謀棺衾時日景正中天無纖雲忽霹靂一聲屠者震死跪於街側手持原金衆競取之力奪不解李至探手得金一時稱快



乾隆戊寅五月南鄉山中久雨水漲夜既半驟入某棚合  
室驚潰婦急不得衣走棚後坡上立水衝坡將崩鄰人  
有立隔溝上坡者呼之走婦慙不應鄰人曰急難之際  
尙何嫌疑亟踰溝走可逃命也引手援之婦堅拒曰吾  
不顧命矣言未畢而坡崩遂溺死邑人盧金鏡作夜大  
水樂府哀之

瀧溪今桑溪瀧音雙水之源曰瀧桑溪劉氏崩出劉宣義  
古碑有其先自德安遷武寧瀧溪本邑黃陂免解進士  
女婿余炳龍書訪之余譜竟無其人世之湮沒不傳及  
傳而訛者大率類此炳龍字漕元

宋武帝時武寧楊歡妻妊女從股中生至齊猶在  
見路史  
以下新增  
高坪古樹長約十丈許大四十圍枝幹繁茂無花實歲二

易葉或至於三初葉圓如珪繼而上圓下銳其色碧三  
則奇出作鹿角狀其色紅雖博識者不能名爲何物也  
宋黃山谷贈邱十四郎墨跡相傳雍正間分寧陳步廬得  
自都門後爲鄉人劉墨莊購去旋歸邑程盟山家因  
爲刻石粵西石儀亭宰武見搨本索觀手稿愛而欲留  
之弗獲旣調任玉山復遣伴賫書以請程氏子式故與  
石善舉而畀之惟石刻今尙存

嘉慶戊辰九月十三日午雷擊太平宮前銀杏遂焚越三  
晝夜而熄灰燼中有骨約數石觀者麋至舐之粘舌乃  
羣拾云

鳳溪由公母樟樹二株循溪而上二里許曰港下有連理  
樟樹二株樹隔深澗澗東者大二十餘圍一根自上橫



亘跨澗石橋倚焉一根自水底斜度與澗西連高大相埒叢柯交互如翠蓋數百年物也

張鉦貴溪人道陵五十九世孫嘉慶丙子冬奉檄抵武寧過箚溪俯江樓道經曲池七姑橋橋下水深丈餘初有魚長數尺圍圍然泊岸見者捕之魚或遠或近誘至深處捕者幾瀕於危遇行人救之半晌方蘓鉦書符投之魚怪遂絕

鳳溪石陂堰灌田三千餘畝其堰湍廣可數畝每遇旱涸照下蔭上法輪流車堰日間車淺夜半輒漲每車至四五日有二大魚出游必滂沱大沛屢驗

吳祐字漢卿號節山坊市人以歲貢任江蘓嘉定縣主簿蒞官三載解組歸琴書之外別無長物士論高之姪吳

宗周由選貢任南直應天府教授宗儒爲名下士馮志稱其博通古今士林翹楚宗周與邑孝廉方繼懋友善爲諸生時讀書鹿洞洞田半爲土人占隱相與清出田數十頃見鹿洞志前明隆慶間邑令胡東陽聘祐主修縣志兩公協理悉心蒐羅規模大備而祐伯姪弟兄人品學問一堂濟美時稱爲三吳云

盧琳字天谷號耘吾長樂鄉大田人少負奇氣喜文章摹秘閣諸書旣由武科宦南漕訖遂歸扁戶讀書十餘年所爲詩文益工其於書法乃大得意年雖老猶手此不疲事二親待昆弟皆善遇後輩霽顏相對舉古人成敗得失爲勸戒聞者多所感激著有耘吾詩草一夜軒文集



陳奇文順義鄉地平人生平以濟人爲心康熙丙申歲三月雨彌日水驟漲泊河廬舍飄拆殆盡先是奇文結茅棚數椽於高阜造竹筏治火具人求其故曰爲此以防水之不虞也族里咸笑其迂一夕水暴至奇文以有備而免併得接其未濟者于是活人甚眾

程永川年豐鄉南坪人性孝友兄緣事戍黔永川從之往徒步三千餘里蒙犯霜露足指皆裂至數月歸告兄平安於母以慰其心已復往省數次有女兒嫁於龔夫死子喪四孫皆幼而厚於貲永川爲之經紀出入絲毫不苟貲遂日拓居十有三年龔孫長告歸龔具二百金爲壽永川曰吾爲爾祖孫寡弱而來豈圖厚報耶麾之不

受

盛兆基坊市人博覽羣書通曉大義父病痺數載服侍不離左右父歿奉母尤篤無何疾作自知不起命妻子曰吾不能侍老母餘年罪莫大焉死必以斬衰加我身否則目不瞑矣妻子如其言於同懷兄弟八人皆怡怡然有無相濟胞姪翹自諸生選拔貢入成均每試必優與資斧族隣貧乏者亦周卹不吝年未及中壽而歿人咸惜之

呂字號適菴臨江清江人幼隨人張藥肆於武寧遇張閏榻指授書義篝燈夜讀遂能詩古文詞著賈餘集若干卷付梓邑令潮州許勉齋羅田陳韻石得其文皆擊節歎賞湘潭尹吉生來令耳其名夜巡過肆聞琴聲歎關而入相得甚歡久之以祖母某太夫人節孝傳見屬呂



均無所干謁念少長於武學成於武徵集前輩詩歌閉戶評選數月成帙將付剞劂以有空礙不果年六十七歿於肆

盛遇楨字樹芳江陰鄉人生性樸訥足跡不履城市躬耕養親能盡子職母歿繼母氏石後其父數十年卒楨侍奉不懈弟遇楠早喪子女皆幼教育嫁娶如已出家無厚產每歲施穀若干石於養濟院命後裔垂爲定額

柳山寺本悅仙院向棲羽流今爲釋子所居前有石門鐫七絕四章不書作者姓字詩云初日暉暉照翠苔庭前昨夜碧桃開一簾香霧微風動知是仙人跨鶴來深院棋聲日正長博山添火蒸沉香道人鞭起竜行雨帶得東潭水氣涼天院涼風似水流山中瑤草不知秋黃庭

讀罷無餘事鉄笛一聲閒倚樓養就還丹不怕寒獨騎黃鶴上雲端笑談若得天家雪散作琪花滿石欄世傳爲山谷詩按宋嘉定時紫清真人葛長庚嘗登是山爲李太亞作湧翠亭記今玩是詩筆意似與記相類殆爲長庚所作歟惜無紫清詩文全集可証也

田李氏字阿芸貢生李蓋孫女幼歸田家貧侍姑病刲臂以進事聞知縣尹作翰賜紀孝詩一時和響者衆刻有紀孝詩鈔又余賢霖妻盧氏精蘊女幼歸余道光元年五月亦有刲臂救姑事與李氏同皆可紀也尹詩見藝文

附詳請武邑照寧州例院府連場考試原案

乾隆八年童生徐士鐸等以應試程途遠阻額恩院府



連場等情具呈前縣鄭 詳請 前府憲吳照寧州例  
 於 學憲按臨之先造冊送試以省諸童一番跋涉等  
 因奉 批如詳行繳嗣於乾隆十年據童生盛於虬等  
 稟請勒碑以垂久遠奉前縣嚴在昌批院府連場考試  
 係奉 前府憲暨府憲體恤單寒之意既蒙恩准於前  
 自無更改於後據稟勒石垂久聽爾自便可也該童盛  
 于虬等未及勒碑乾隆十七年童生盧大炳等以學憲  
 歲試未周恐府憲檄行催考復以前情并抄叙各案具  
 呈前縣鄒業經據情詳請循行舊例等因奉前府憲張  
 批如詳飭遵繳已上自乾隆八年起至十七年止各  
 屆考試俱循行舊例院府連場在案乾隆十九年前府  
 憲朱 檄催考試復經童生盧大炳等具呈前縣鄒詳

請仍循舊例一體栽培等因奉 批查該縣童生歷來  
 挨至學憲開考尚未府試臨期促迫諸務潦草如此  
 大典豈容姑息市恩致滋慢悞今番因恐仍沿舊習輒為  
 請寬久經備牌行縣何竟並不寓目一任經胥混詳殊  
 屬不合現在最遠如寧州亦已遵照未便延緩仰即將  
 文武童趕緊試竣令即促裝來省候期無違此檄等因  
 各該童遵照於六月赴府考試至臘月院試往返半年  
 費斧不給乾隆二十二年童生吳沅等復以因地制宜  
 等情呈縣本縣宋 據情轉詳竊照文武諸童縣試已  
 竣自應遵照 憲檄示期造冊批送聽候考試緣卑縣  
 僻處山陬距省寫遠更兼溪河一線水淺灘高往返動  
 需時日是以乾隆八年及乾隆十七年前令鄭大敬鄒



應元任內經各儒童等呈請院府連場考試詳蒙 前  
 府憲節次批允在案嗣於乾隆十九年前令又復具文  
 請示奉 前府憲朱批飭恐臨期迫促諸務潦草駁飭  
 照舊批送候考亦在案茲據卑縣童生吳沅等連名籲  
 請復詳前來卑縣復查考試為士子進身之階豈容憚  
 往返之勞姑息遷就諸童之中或住居鄉僻或遠館隔  
 屬兩番解館赴省不特費斧艱難更恐有妨教讀貧寒  
 之士每慮失館致生畏阻之心倘蒙 憲恩垂念單寒  
 仍循舊例於 院試將次按臨之時飭令諸童同赴  
 憲轅連場考試則諸童仰沐栽培比戶頂祝 憲德矣  
 卑職未敢擅便理合據情詳請 憲臺酌奪批示飭遵  
 等因奉 府憲積 批如詳行繳復據生員張國學等

具呈 學憲勒石成規奉 學憲張批飭查議到府行  
 縣該本縣宋 查雅化造士首錄單寒路遠貲艱墮其  
 進取殊非茅茹彙征之意雖臨期接考稍與先期考錄  
 之例未符而鼓舞羣倫原在因地制宜若非詳明立案  
 則或駁或准既無一定章程即每次詳明亦不無數繁  
 案牘應如該生等所請轉詳飭遵但 院府連考府屬  
 有卑縣及寧州不便兩岐似應卑職會同寧州酌議核  
 定距 學憲按臨若干日期畫一齊集赴 憲轅考試  
 逾期均不收錄再事關考試

大典攸關應請通詳 各憲刊入縣志庶可永遠遵循至  
 刻碑立石禁革民間事宜期於觸目警心而設今衡文  
 考校仰蒙 各憲栽培俾寒士均沾樂育俯允連場有



案可稽足垂久遠且恐藉立碑名色致啟科歛之端該生等所請勒石成規之處毋庸議緣奉飭議是否允協理合粘連奉發原詞詳候 憲臺核示遵行等因復移 寧州會詳奉 府憲積 批查寧州生員何易謙等並該縣生員張國學等先後赴 學憲衙門具呈均奉批飭照所請辦理遵照在案則是府考儒童自可不必再行通詳但連場考校若不預定日期致恐臨時周章嗣後俟 學憲取齊文檄到府本府行知該縣卽行傳齊赴考不得再爲延挨恐有遲悞可也等因 梁志

附邑人呈請勒石永禁差役乘轎下鄉私帶白役碑誌

武寧縣正堂王 抄奉 南昌府正堂楊 爲謝恩懇

恩事案據武寧縣民陳安谷等具控緣民武邑僻處山

隅每逢訟案及縣各公事等屢遭差役乘轎下鄉私帶白役擾累民難堪命迭經稟縣並不查究以故弊竇日熾慣成積習迨舊五月民等備情泣稟蒙 前憲蔡痛念民艱准出示禁奉批另錄嗣因卸篆批示未示 邵陞憲榮任民復接叩沐出示禁遍貼鄉城蠹等始知畏法萬民咸頌生佛弊絕風清民安樂土但蠹狡猾異常禁不垂久弊必復生若僅出示貼禁而不勒石永杜在目前雖可保無害誠恐相傳未久紙朽字朦不無故轍仍蹈之累茲幸 大憲福星駕臨德政交頌此種擾累斷不肯稍存寬宥必不忍留害將來爲此具呈叩請捨准勒石飭縣豎碑嚴禁恩垂不朽蠹害永杜合邑戴德萬代沾恩上告等情據此除詞批示外合行檄飭爲此



票仰該縣立即遵照迅將前發告示勒石示禁仍將碑  
摹印刷一紙具文送 府查核毋稍縱延干咎速速須  
票等因到縣奉此除嚴行查究外合行勒石爲此示諭  
各里民知悉自後如有差役仍蹈前轍許卽指名稟究  
該各差役等務宜遵例守法如遇詞訟案件并征催錢  
糧毋許乘轎下鄉私帶白役故違擾累一經訪聞或被  
告發定卽嚴行究辦決不姑寬該里民等亦不得藉端  
滋事稟遵毋違特示 南昌府正堂邵 爲嚴行示禁  
事案據武寧縣民陳安谷等具控差役乘轎下鄉及私  
帶白役久奉飭禁何以該縣胥役尙敢故違擾累除飭  
縣嚴行查究外合行示禁爲此示仰該縣軍民人等知  
悉嗣後縣差再敢乘轎下鄉私帶白役擾累許卽扭稟

該縣解府嚴究鄉保人等如敢通同徇隱查出一併重  
究不貸各宜凜遵毋違特示 嘉慶四年六月豎立署  
前

武寧縣志 卷之四 雜記 九百五十二



一附各鄉捐輸修志姓名 乾隆壬寅

安樂鄉

張耀南 石韻圃 王茂元 王鏡溪

日休堂 以上捐銀拾兩

昇仁鄉

劉臨萬 拾伍兩 張維藩 拾貳兩 劉光廷 拾貳兩

黎秀坡 拾貳兩 陳金章 夏理藪 聶步蕃 黎碧崕

劉雲從 以上捐銀拾兩

年豐鄉

生員李瑤 肆拾兩 程王儒 拾伍兩 李亭坡 劉廷占

朱璧英 以上捐銀拾兩

上南鄉



鄒盛猷

肆拾兩

周得華

貳拾兩

劉美瑞

貳拾兩

楊昌哲

拾肆兩

丁明達

張玉鉉

張兼善

熊恒茂

姜希選

張婉如

陰剛生

朱頤中

張旭旦

鄒文宇

胡君祿

羅南峰

葉旦成

葉得中

吳如公

葉耀祖

葉從雲

葉汪度

葉任如

葛天儀

陳國仲

羅杏林

張丙文

葉煥章

張文賢

劉大業

以上捐銀拾兩

下南鄉

吏員李彩希

周敬公

陳為質

鍾蒂拔

邱直山

趙達隆

以上捐銀拾兩

江陰鄉

蔡精通

胡富六

胡式谷

以上捐銀拾兩

長樂鄉

監生舒承志

貳拾貳兩

董子夫

拾壹兩

下港盧眾

拾貳兩

李俊賢

盧永言

孫世顯

貢生盧呈藻

監生

舒兆起

以上捐銀拾兩

順義鄉

陳次璜

拾陸兩

鄭日璿

余偉芳

以上捐銀拾兩

熊太寧

熊鳳昭

熊選賢

仰裕文

段元善

胡海

胡商璧

葉鳳集

葉孔達

葉萬邦

周克緒

周奉莪

鄭文穆

黎經遠

蕭次吳

徐珍廷

黃應清

陳又新

以上捐銀拾兩

楊谷用

捐銀叁兩

朱裕鼎

捐銀叁兩

雷肖江

胡周言

王孟昇

以上捐銀拾兩



新修縣志跋

道光壬午歲 上憲諭修江西通志及洪都書院  
育嬰堂繩金塲等事邑 明府陳公秋河先生集  
各鄉紳士謀之無不踴躍從事惟通志一項必先  
修縣志乃足以資採擇復按格式各屬分門編輯  
慎其事所以重其書也吾邑志書 梁明府編輯  
後越今四十餘載其間應行增入者頗多爰設局  
正誼書院 明府總其成折衷可否一秉至公同



邑諸君子各分其任予適奉檄委署贛州府教授  
未獲共襄其事次年夏卸事旋里大綱已舉予亦  
間參末議互相校讐稿成申送 府憲核定將以  
付梓而各鄉所輸經費不敷艱於籌辦 明府與  
諸君子命予為主修予出六百餘緡應之上舍余  
君相復以三百緡益之而志乘適觀厥成矣是後  
也經始於癸未仲春告成於甲申季夏門分三十  
有二卷分四十有四計字四十一萬三千有奇鈔

成一十二帙拾遺補闕有善必彰美哉徵文考獻  
之資其在斯乎予竊以為馮志值兵燹之餘典籍  
散亡未免簡陋郡志雖燬而蒐羅廣博考覈精詳  
良費苦心其藝文一帙悉經余盛法先輩陶潤以  
成實為志乘大觀後之修志者斟酌損益足稱完  
善武雖編小人文不盛於他邑而覽志乘者未嘗  
不嘆有本有文足以信今而傳後也道光四年秋  
七月既望前署贛州府教授邑人張紹璣謹跋





Three vertical columns of text in seal script, arranged from right to left. The text is highly stylized and difficult to decipher, but it appears to be a formal inscription or a list of names. The rightmost column contains the most legible characters, which may include names or titles. The middle and left columns contain more dense and less legible script.